

Ang Basehan Sa Pagtuo

Ang pagtuo usa ka malukpanong konsepto. Mao kini gihimong sukaranan sa relihiyon Cristianismo man o bisan unsa. Apan nganong wala man kini hingsabtig maayo? Atong tun-an ang bahin lang sa pagtuong Cristianismo; ug aniyay pipila ka gihan-ayng pagtulun-an gikan sa Biblia nga hinaut maghatag ug kasinatian kon unsa gayod ang mga unod ug uyok sa pagtuo.

Ang pagtuo usa ka hiyas diin ang kinatibuk-ang kumunidad sa mga relihiyon, Cristianismo man o dili, maoy gikuptan ug gisaligan nga magdala kanila paingon sa kaluwasan. Mao kini hinungdan nganong magpaanib sa relihiyon ang tawo. Ug kong nasakop na siya niini, ikapasigarbo na kini niyang ideklara nga aduna na siya'y dakong pagtuo apan natukib ba kaha nato'g maayo ang mga tilimad-on sa usa ka maligdong nga pagtuo sa Dios? Aniyay mga pangutana ug mga tubag nga makahatag ug katin-aw sa usa ka pagtuo.

Buta ba ang Pagtuo?

Kadaghanan sa mga relihiyoso—angkonon o ilimod man kini—wala magdukiduki sa mga butang nga ilang gituohan. Malagmit napanunod lang nila kini sa mga katigulangan, o dili ba kaha nagpaanod lang sila sa dagayday sa mga butang nga gituohan na sa kadaghanan; ug wala nila sukitsukita kung unsa ka matuod ang nabatasan nang gituohan. Aduna usa'y uban nga mokuyog lang sa usa ka religious organization aron lang hatagag katagbawan ang ilang kahaw-ang ug kamingaw gumikan sa pag-inusara.

Ang kagustohan nga masayran ang kamatuoran dili usa ka tanghaga nga ang mga mahait lang ug salabutan sa teolohiya sa Dios ang adunay katakos nga makasabot niini. Dili kini lisod sabton kon ablihan lang ang atong panghunahuna.

Karon, nganong mahinungdanon man nga sutaon nato ang atong namat-an na nga mga gituohan? Natural lang kay ang pagtuo dako'g kalabotan sa atong gilaoman nga kaluwasan.

Kon ikaw usa ka matinud-anong deboto sa imong relihiyon, nanginahanglan ka ug dakong pagpakabana niini. Gugolan kini nimo ug panahon, sakripisyo ug salapi ilabi na kong aduna'y mga tulumanon sama sa mga kapistahan; sakripisyong dili sayon ang imong gisudlan.

Labaw sa tanan, dili ba pait handurawon nga bisan pa sa kaligdong sa imong pagsalig ug paglaom nga imong gigahin para sa imong gituohan, sa kinatumyan niini dili diay tukma sa kamatuorang gilatid sa mga pulong sa Dios. Ang salapi dali makit-an, apan ang uwat o lama sa kapakyasan sa mga butang nga gilaoman dili dali pad-on sa panumduman—ilabi na kon mao na kini imong giamuma sukad pa sa sinugdan.

Kinahanglan maneguro kita nga ang atong gituohan lunsay gayong magagikan sa tuburan sa kamatuoran. Ug ang kamatuoran nagagikan lang sa mga balaanong pulong sa Dios.

Busa, magmatngon, dili basta bastang sagupon ang mga “pagtulun-an” nga giduso sa mga nagproklamang sila kuno mga gitugyanan sa kamatuoran. Hinunua nga si Cristo mismo adunay pasidaan: “Pagbantay kamo ug ayaw kamo palimbong ni bisan kinsa, kay sa akong ngalan, daghang tawo ang moanhi ug mag-ingon, 'Ako ang Mesiyas!' ug daghan ang malimbongan. Kay manungha ang mga mini nga mesiyas ug mga mini nga propeta; maghimo sila'g mga dagkong milagro ug mga katingalahan aron pagpasalaag sa mga pinili sa Dios kon mahimo pa. Timan-i nga gipasidan-an ko na kamo niini.” (Mateo 24:4-5, 24,25)

“Ebidensiya” sa Pagtuo

Ang Hebreo capitulo 11 maoy giilang capitulo sa pagtuo. Dinhi atong 'mahimamat' ang mga tawo nga maoy nahimong sumbanan kon unsa gayod ang walay pagkalaya ug pagduha-duhang pagtuo sa Dios. Atong susihon kon ila na lang bang gipiyongan ang mga butang nga ilang gituohan. Paminawa, Hebreo 1:1, “Ang kahulogan sa pagtuo mao nga may pagsalig kita sa butang nga atong gilaoman ug dili nato makita.”

Kon kutob ra nianang versiculoha ang atong himoong sumbanan sa pagtuo, dili na diay kinahanglang sutaon pa ang mga butang nga angayan natong tuohan. Dili na ba diay kinahanglang magsukitsukit pa kita sa mga gipanangyaw sa mga nagpatuo-toong mga magtutudlo sa “kamatuoran”? Ato kunong padayonon sa versiculo 3 kon tinuod ba: “Pinaagi sa

pagtuo masabtan nato nga gibuhat ang kalibotan pinaagi sa pulong sa Dios, ug ang atong makita gihimo gikan sa mga butang nga dili nato makita.”

May pruweba diay ang mga butang nga dili makita; ug ang pruweba niini mao ang mga butang nga atong nakitang nagaliyok sa atong kataliwad-an. Dinhi atong mapiho nga walay laing gipaila nga dili makita kon dili ang Dios nga maoy nagmugna sa langit, yuta, ug tanang butang sa tibuok kalibotan sukad pa sa sinugdan. (Genesis 1:1; Efeso 3:9; Buhat 17:24) May mga dugang pang pagpamatuod nga ang tim-os nga pagtuo wala mag-aghat nga magpakabuta ka na lang sa mga butang nga angayan nimong tuhan. Paminawa si Apostol Pablo: Ang masayran sa tawo bahin sa Dios gipadayag Niya kanila sa klaro gayod. Ang Dios gayod maoy nagpatin-aw niini kanila. Sukad buhata sa Dios ang kalibotan, ang IYANG DILI MAKITA NGA KINAIYA, ang Iyang gahom nga walay kataposan, ug ang Iyang pagka-Dios nakita nga klaro kaayo diha sa mga butang nga gibuhat sa Dios. Busa, wala na silay ikabalibad. (Roma 1: 19-20)

Balikan nato ang capitulo sa pagtuo. Hebreo 11:13-16: “Nangamatay silang tanan diha sa pagtuo. Wala sila makadawat sa mga butang nga gisaad sa Dios, apan bisan layo pa kaayo NAKITA NA NILA KINI ug gikahinangop nila ug miila sa dayag nga sila mga langyaw ug mga dumuduong dinhi sa kalibotan. Kadtong nagsulti sa ingon nagpahayag sa matin-aw nga nangita silag usa ka nasod nga ilang kaugalingon. Wala na sila maghunahuna sa nasod nga ilang gibiyaaan; kon naghunahuna pa sila niini, makapauli unta sila. Hinunoo, gipangandoy nila ang labi pang maayong nasod, ang langitnong nasod. Busa wala ikaulaw sa Dios nga sila moila Kaniya nga ilang Dios, kay nag-andam man Siyag usa ka siyudad alang kanila.”

Atong mabasa ang gihisgotang siyudad sa Gipadayag capitulo 21—and Bag-ong Jerusalem, ang balaang siyudad nga mokunsad gikan sa langit ug dinhi sa yuta ipahimutang sa Dios Amahan.

Atong nasaksihan sa mga garayng gipahayag sa Hebreo 11 nga ang mga ancianong gikahimut-an sa Dios adunay basehan sa ilang pagtuo. Naaninaw ug nasabtan nila kini'g maayo; gihanduraw ug gikuptan sa kanunay tungod kay nasilsil na sa ilang alimpatakan ang mga saad sa Dios.

Dili lang kana—gipanugid pa nila kini, ug bug-os nga gilaoman tungod kay napa- matud-an ug nasulayan na nila ang pagka matinud-anon sa nagsaad.

Klaro gayod nga ang pagtuo nanginahanglan ug tin-awng pruweba aron ang magtutuo adunay basehan sa iyang mga gituohan. Dili “buta” ang tim-os nga pagtuo!

Milagro –makapadasig ba sa Pagtuo?

Sa pakakaron, wala pa kita kaayo'y nasaksihang mga milagrang kahibulongan ug di ba kaha mapakakugang sa sulod sa matuod nga Iglesya sa Dios. Aduna hinuo'y pipila ka mga insidente nga kon atong lantawon pagkatapos sa dagan sa panahon makaingon kita nga maipahinungod sa gahom sa Kahitas-an.

Ug kon aduna man ugaling, talagsaon ra ang makonsiderang dili ordinaryong mga panghitabo. Layo kaayo kon ikumpara sa panahon ni Cristo ug mga apostoles diin nabuhi pag-usab ang mga minatay (Juan 11:43-44; Buhat 9: 36-41; Buhat 20:9), o dili ba kaha nawagtang sa diha-diha ang mga makamatay nga mga balatian sa dihang nalandongan lamang sila sa anino ni Pedro. (Buhat 5:15-16)

Sa pagkatinuod, bisan pag magpakita ug makahibulongan nga mga hitabo ang Dios, dinha mismo sa atong atubangan, ug kon dili kita motuo, walay mahimo ang Ginoo. Ang karaan ug bag-ong tugon sa Biblia puno sa mga talaan sa mga makapakugang nga mga milagro.

Apan ang nahisulat sa Hebreo 3:16-19; 4:2-3, atong mabasa nga sa kadaghang milagrang nasaksihan sa mga Isrelitas, gikan sa Ehipto hangtud sa ilang pagawas sa pagkaulipon, wala gihapon sila makasulod sa yuta sa mga saad tungod sa ilang pagkawalay pagtuo.

Si Cristo nga mismo atong Manluluwas - ug sa motuo ka'g sa dili - dinha na sukad pa sa sinugdan kauban sa Dios Amahan, ug Siya usab ang aktuwal nga nagmugna sa tanang butang (Col. 1:15-17; Juan 1:1-3; Hebreo 1:3), ubos sa pagdumala sa Dios Amahan (Efeso 3:9); daghan kaayog milagrang gihimo sa sinugdanan pa sa iyang pangalagad. Ang mga milagro ni Jesus: Juan 4:43-48; Juan 2:6-9; Lucas 4:3-41; Mateo 8:14.

Tan-awa: Si Jesus misuroy sa tibuok Galilea ug nagtudlo sa ilang mga sinagoga, ug nawali sa Maayong Balita bahin sa gingharian sa Dios, ug nag-ayo sa mga masakiton. Mikaylap sa tibuok Siria ang iyang kabantog, ug gidala sa mga tawo ngadto kaniya ang tanang nag-antos sa nagkalainlaing mga sakit ug mga balatian; mga giyawaan, mga patulon, mga paralitiko, ug giayo ni Jesus silang tanan. Daghang mga tawo nga misunod kaniya gikan sa Galilea, sa Decapolis, sa Jerusalem, sa Judea, ug tabok sa Jordan (Mateo 4:23-25).

Kahudtan ta'g mga panid kon ilita nato ang tanang mga milagrong gihimo ni Jesus sukad sa Iyang pangalagad sa dinhi pa Siya sa kalibotan. Ang pangutana: Sa mga nakasaksi, nagpabilin ba ang ilang pagtuo kang Jesus?

Sa kadaghan sa mga tawo nga nakasaksi sa Iyang mga milagro, sa kadaghan sa nagasahan ug nakapahimulos sa iyang gahom pinaagi sa pagpaayo sa mga adunay balatian, pipila lang ba ang nagpadayon sa ilang pagtuo kang Jesus? Kini la'y hunahunaa; ang talaan sa magtutuong nanambong sa usa ka panagtigom nga gipanguhan ni Pedro sa bisperas sa adlawng pagsaulog sa Pentecostes atong maaninaw ang dili makadasig nga numero—120 ra. (Buhat 1:15)

Kon atong balikan; sa tulo lang ka milagro nga adunay dakong kalabotan sa kinaham sa tutunlan ug pagkabusdik sa tiyan, bana-banaa ug pila na ka tawo ang nakasaksi sa mga milagrong gihimo ni Jesus. Sa kasal didto sa Cana diin ang mga versiculo nagpahayag nga unom (6) ka tadyawng kasudlan ug 20 ngadto's 30 ka galon matag usa ang tubig nga gihimong bino. (Juan 2:6-9) Sulayi'g kwenta ug pila ka tawo ang nanginom niini. Bino kini nga adunay insaktong sambog nga alcohol. Silang tanan nakasaksi sa milagro. Dugang pa, gipahinumduman ni Jesus ang Iyang mga tinun-an sa duha ka okasyon diin gipakaon Niya ang mga tawo nga nagsunod-sunod Kaniya.

Paminaw: “Pagkagamay sa inyong pagtuo! Wala ba gihapon kamo makasabot hangtod karon? Wala ba kamo makahinumdom sa lima ka pan nga akong gipikaspikas alang sa lima ka libo ka mga tawo? Pila man ka bukag ang napuno sa salin? Ug mahitungod niadtong pito ka pan alang sa upat ka libo ka tawo, pila man ka bukag ang napuno sa salin? (Mateo 16:9-11)

Pipila ra diay sa tanang nakaambit sa gahom sa iyang pagpanambal ug nakasaksi sa mga makapakugang Niyang mga milagro ang nagpadayon sa ilang pagtuo kang Cristo? Sa naunang pahayag 129 ra! (Buhat 1:15)

Kong atong balikan sa karaang tugon, atong mabasa kon giunsa pagpagawas sa Dios ang mga Isrelitas nga naulipon sa mga Ehiptohanon sulod sa 430 ka tuig. (Exodo 12:40-41)

Dili lalim kon unsa ka kahibulongan ang mga gipakitang milagro sa Dios. Atong sugdan sa Exodo 7:10-12. Dinhi gipakitaag milagro ni Moises ang hari pinaagi sa pag-itsa sa iyang sungkod nga nahimong halas nga gisundog usab sa mga salamangkiro ni Faraon, apan gitukob lang kini sa halas nga gikan sa sungkod ni Moises. Apan wala gihapon tugoti sa hari ang gipangayo ni Moises. (v13) Pila na ba ka mga kahibulongang mga nahitabo ang midangat sa Ehipto usa' makaamgo ang hari sa gahom sa Ginoo unya nangaliyupo siya kang Moises aron undangon na sa Dios ang makalilisang nga mga silot? (Exodo 10:17)

Una, ang pagbunal ni Moises sa suba pinaagi sa sungkod ug nahimo kining dugo. (Exodo 7:17-23) Ikaduha, ang pagkatap sa mga baki sa mga kayutaan hangtod sa mga balay sa mga Ehiptohanon. (Exodo 8:6) Ikatulo, pagpadala sa Ginoo ug bagang panon sa langaw nga mikatap sa tibuok yuta sa Ehipto. (Exodo 8:24) Bisan gani ang mga Isrelitas nga gipakitaag daghang mga milagro gikan sa ilang pagawas sa Ehipto hangtod sa paglawig sa kamingawan padulong sa yuta nga gisaad sa Dios wala gihapon magpadayon sa ilang pagtuo sa Dios. Atong makita sa Hebreo kon unsay ilang gidangatan isip pahimatngon sa mga kristiano sa ulahing mga adlaw.

Mga Milagrong Malimbongon

Kadaghanan nagtuo nga ang mga milagro inubanan kanunay sa gahom sa Dios. Tinuod ba? Atong susihon ang usa ka makalilisang hitabo sa umaabot nga panahon diin ang milagro nahimong kahilipsan aron madani sa pagsimba sa dili matuod nga dios ang katawhan. Usa ka gamhanan kaayong tawo ang magpakitag dili basta-bastang abilidad pinaagi sa dili ordinaryong gahom nga maoy makapadani sa kadaghanan aron mosunod kaniya. Mahitabo kini sa ulahing mga adlaw usa' pa mobalik si Cristo.

Paminaw: “Ayaw kamo palimbong ni bisan kinsa sa bisan unsang paagi. Kay ang maong adlaw dili moabot kon dili pa mahitabo ang kataposang pag-alsa batok sa Dios ug dili pa motungha ang Tawong Yawan-on nga gitagana alang sa

impverno. Supakon niya ang tanan nga gipakadios ug gipakabalaan sa tawo. Magpalabaw siya kanilang tanan, ug gani mosulod ug molingkod siya sa Templo sa Dios ug moangkon nga siya Dios. Wala ba kamo mahinumdom nga gisultihan ko kamo niining tanan samtang ako uban pa kaninyo? Apan may nagpugong niini aron dili kini mahitabo karon, ug nasayud kamo niini. Busa sa panahon nga gitagal, moanhi ang Tawong Yawan-on. Ang tinagoang gahom sa Tawong Yawan-on milihok na, ug madayag lamang kining gahoma kon kini dili na pugngan sa nagpugong niini. Unya ang Tawong Yawan-on moanhi ug patyon siya sa Ginoong Jesus pinaagi sa huyop ug sa kasulaw sa Iyang pagpadayag. Ang Tawong Yawan-on moanhi nga may gahom ni Satanas ug maghimo sa tanang matang sa milagro ug mga buhat nga katingalahan. Gamiton niya ang tanang paagi aron malimbongan ang pagalaglagon, kay wala man nila dawata ug higugmaa ang kamatuoran nga makaluwas unta kanila. Tungod niini, gihimo sa Dios nga malimbongan sila ug motuo sa bakak, aron kasilotan ang tanan nga wala motuo sa kamatuoran, kondili nagpatuyang hinuon sa sala. (2 Tesalonica 2:3-12)

Dugang pa: “Unya nakita ko ang laing mananap nga migula sa yuta. (Dili migula sa langit—busa yutan-on, tawhanon) May duha kini ka sungay nga sama sa nating karnero (malimbongong Cristo, 2 Cor. 11:14), ug misulti siya sama sa dragon (suta kinsa ang dragon sa Gipadayag 12:9). Gigamit niya ang dakong awtoridad sa unang mananap diha sa iyang atubangan. Unya gipugos sa mananap ang tibuok kalibotan pagsimba sa unang mananap nga may grabing samad nga naayo na. Mihimog dagkong milagro ang ikaduhang mananap; mipaulan kinig kalayo gikan sa langit atubangan sa tanang tawo. Ug **NALIMBONGAN NIYA ANG TANANG KATAWHAN PINAAGI SA MGA MILAGRO** nga gitugot nga buhaton niya atubangan sa unang mananap. (Gipadayag 13:11-14)

Napamatud-an nato gikan sa duha ka hut-ong nga mga versiculo nga ang mga makapakugang nga milagro dili tanan nagagikan sa gahom sa Gino. Busa, ang milagro dili mahimong sumbanan sa malig-on nga pagtuo sa Dios. Dali kining himoon ni Satanas pinaagi sa iyang mga solugoon.

Kinsang Pagtuo ang Kinahanglan?

Una sa tanan ang pagtuo o faith ay pistis sa pinulongang griego. Ang mga kahulogan niini mao ang mga mosunod: persuasion (pagdasig, pag-awhag), conviction (kumbinsido), belief (pagtuo), assurance (kaseguroan). Adunay mga magtutudlo sa biblia nga ang pagtuo kuno gasa gikan sa kahitas-an. Hiyas kuno kini nga nagagikan sa Dios lamang ug ipaam bit kini diha kanimo aron lig-onon ang imong pagtuo sa Dios. Unsa kaha kini ka tinuod? Aduna bay basehan ang maong konsepto? Atong susihon kon unsay panlantaw ug gipanulti ni Cristo bahin niining butanga.

Atong usa-usahon aron masinati gayod nato kon diin magagikan ang pagtuo, ug kon kinsay angayan magpasundayag niini.

1. Matod ni Jesus, pagkadyotay NINYO ug PAGTUO; Mateo 6:30.
2. Sultihan ko kamo nga wala ako makakitag PAGTUO dinhi sa Israel nga sama niini, Mateo 8:10.
3. Pagkagamay sa INYONG PAGTUO, Mateo 8:26.
4. Nakita ni Jesus ang kadako sa ILANG PAGTUO Kaniya, Mateo 9:2.
5. Maayo kamo sumala sa INYONG PAGTUO, Mateo 9:29
6. Pagkadyotay sa IMONG PAGTUO, nganong nagduhaduha ka man? Mateo 14:31.
7. Inday kadako sa IMONG PAGESALIG, Mateo 15:28.
8. Pagkagamay sa INYONG PAGTUO, Mateo 16:
9. Tungod wala KAMOY IGONG PAGTUO. Hinumdomi nga kon KAMO MAY PAGTUO nga sama sa liso sa mustasa...Mateo 17:20.

Sa evanghelyo pa lang kana ni Mateo, wala pa nato iapil ang mga evanghelyo ni Marcos (Mk.2:5, Mk.4:40 Mk. 2:5; Mk. 4:40; Mk.5:34; Mk.10:52; Mk.11:22) ug kang Lucas (Lucas 5:20 7:9; 7:50; 8:25; 8:48; 12:28; 17:6; 17:19;18:8; 18:42;22:42).

Nakita nato sa mga talaang atong gikutlo gikan kang Mateo, Marcos ug Lucas kon kinsa ang angayan magbaton ug magpasundayag sa lunsayng pagtuo. Walay lain kon dili ang magtutuo mismo ang adunay responsibilidad niini. Dili kini magagikan sa Dios.

Ania ang pahayag ni Apostol Pablo:

“Maluwas ka kon ipahayag mo nga si Jesus Ginoo, ug sa kasingkasing MUTUO KA nga gibanhaw Siya sa Dios. Kay MITUO MAN KITA sa kinasingkasing gayod, gimatarong kita sa Dios; ug naluwas kita kay gipahayag man nato kini. Kay ang kasulatan nag-ingon, “Ang NAGTUO Kaniya dili gayod magmahay.” Alang kini sa tanan sanglit wala may kalainan sa mga Judio ug dili Judio; and Dios maoray Ginoo sa tanan, ug manalangin sa tanan nga magsangpit Kaniya. Sumala sa Kasulatan, “Ang tanan nga magsangpit sa ngalan sa Ginoo maluwas.” Apan unsaon man nila pagsangpit Kaniya kon WALA SILA MUTUO? Ug unsaon man nila pagtuo kon wala nila hidunggi ang mensahe? Unsaon man nila pagdungog nga wala man kini iwali? Ug unsaon man pagwali sa mensahe kon walay gipadala nga magwawali? Sunala sa Kasulatan, “Pagkatahom sa tiil niadtong nagwali sa Maayong Balita.” Apan wala modawat ang tanan sa Maayong Balita! Si Isaias miingon, “Ginoo, kinsay mituo sa among giwali?” Busa ANG PAGTUO NAGGIKAN SA PAGPAMATI SA MENSAHE, UG ANG MENSAHE NAGGIKAN SA PAGWALI KANG CRISTO.” (Roma 10:9-17) Tin-aw ang pahayag ni Pablo. Nadungog nimo, gitun-an nimo, giduki-duki ug napamatud-an nimo ang kamatuoran – unya MITUO ka.

Ang imong PAGTUO maoy makaluwas kanimo. Nagagikan kini kanato, dili sa Ginoo!

Ang Gasa nga Gikan sa Dios

Unsay mga gasa sa Ginoo? Si Pablo nagsulat: “Kay ang bayad sa pagkasala mao ang kamatayon, apan ang GASA SA DIOS mao ang kinabuhing walay kataposan nga anaa kang Cristo Jesus.” (Roma 6:23)

Dugang pa: “Ang tagsa-tagsa kaninyo kinahanglan maghinulsol ug magpabunyang sa ngalan ni Jesu-Cristo aron pasayloon ang inyong mga sala ug madawat ninyo ang GASA SA DIOS nga mao ang Espiritu Santo.” (Buhat 2:38)

Aduna usa'y nagkalain-laing gasa ang Dios sa Iyang mga pinili aron pagpatuman sa mga buluhaton nga gisangon kanila sa Dios. Makita nato kini sa 1 Corinto 12 ug Efeso 4:7-14.

Pagtuo ug Kaluwasan

Ang Dios adunay mahinungdanong laraw alang sa katawhan. Busa, bisan pa sa sala nila ni Adan ug Eba nga maoy sinugdanan sa pagkahilayo sa katawhan sa matuod nga Dios, naghimo Siya'g paagi aron makabalik ang tawo Kaniya. Ang inilang mga pulong ni Cristo nga gihimong “mantra” sa mga “magtutudlo” sa Biblia nagaingon:

“Kay gihigugma man pag-ayo sa Dios ang kalibotan ug tungod niini gihatag Niya ang iyang Bugtong Anak, aron ang tanan nga MOTUO KANIYA dili mamatay, kondili makabaton hinuon sa kinabuhing dayon. (Juan 3:16)

Bisan diayg gihigugma sa Dios ang kalibotan, ug gibutang Niya sa peligrong kahimtang ang Iyang bugtong Anak alang sa kaluwasan sa katawhan, kinahanglan diayng MOTUO kita kaniya aron maangkon ang kinabuhing dayon nga buot Niyang ihatag. Duna diay kitay responsibilidad sa Iyang planong luwason kita. Kinahanglan aduna kitay PAGTUO. Natural, bisan ikaw kon walay pagtuo sa imong kapabilidad ang usa ka tawo, dili usab kini nimo hatagan ug pagtagad. Tan-awa: Kon ilimod nato Siya (Ginoo), ilimod usab kita Niya. (2 Timoteo 2:12)

Pagtuo nga Inubanan sa Buhat

Busa, unsang klasehang pagtuo ang gikinahanglan aron makabaton ug kinabuhing dayon? Si apostol Santiago adunay gisulti, paminaw:

“Ingon niini ang pagtuo—patay kini kon dili ubanan sa buhat. Apan adunay moingon, 'Ikaw may pagtuo, ako may buhat.' Ang ikatubag ko mao kini, 'Pakit-a ako sa imong pagtuo nga walay buhat ug pakit-on ko ikaw sa akong pagtuo pinaagi sa akong buhat'. Nagtuo ka ba nga usa ray Dios? Maayo! Apan ang mga demonyo nagtuo usab niana—ug nagkurog sa kahadlok. Buang! Kinahanglan ka pa bang saysayan nga ang pagtuo nga dili inubanan ug mga buhat walay kapuslanan? Sa unsa bang paagiha nga si Abraham giisip sa Dios nga matarong? Dili ba sa iyang mga buhat sa paghalad niya sa iyang anak nga si Isaac didto sa halaran? Busa tataw nga ang iyang pagtuo giubanan sa mga buhat. Ug natuman ang giingon sa Kasulatan, 'Si Abraham mituo sa Dios ug tungod sa iyang pagtuo ang Dios nag-isip kaniya nga matarong.' Ug siya ginganlag higala sa Dios.

Busa nakita ninyo nga ang usa ka tawo isipon sa Dios nga matarong tungod sa iyang mga buhat, ug dili tungod sa pagtuo lamang.” (Santiago 2:17-24)

Pagpalambo sa Pagtuo

Ang mga disipulo may gihangyo kang Cristo, matud nila: Dugangi ang among pagtuo. Ug ang Ginoo mitubag, 'Kon duna kamo'y pagtuo nga ingon ka dako sa liso sa mustasa, makasugo kamo sa kahoy nga sikomoro, 'Maluka ka ug mobalhin sa dagat!', ug kini matuman kaninyo. (Lucas 17:5-6) Gihatagan ba o gisultihan lang hinuon kon unsaon pagpalambo sa ilang pagtuo?

Kon atong ipadayon ang kapitulo, atong masabtan pinaagi sa Iyang gihatag nga pananglitan nga ang pagtuo dili magagikan kang Cristo kondili anaa ra kanato. Ug duna Siya'y gisulting paagi unsaon pagpalambo niini.

Paminaw: Pananglitan adunay usa kaninyo nga may sulugoon nga nagdaro o nag-atiman sa mga karnero. Inig-abot niya gikan sa uma, ingnon ba nimo siya, 'Pagdali diha aron mokaon ka'? Dili gayod! Imo hinuon siyang ingnon, 'Andama ang akong panihapon, ug unya pagtapis ug silbihi ako; human niini ikaw na usab ang mokaon.' Ang usa ka sulugoon dili angayng pasalamatan tungod sa iyang pagtuman sa sugo, dili ba? Mao usab kamo; kon nakabuhat na kamo sa tanang gisugo kaninyo, ingna ninyo, 'Mga sulugoon kaming walay kapuslanan, mao ray among gihimo ang mga butang nga gisugo kanamo.' (v7-10)

Unsay pagtulun-an nga gipadangat? Ang leksyon anaa sa ulahing mga garay; kon buot mong madugangan o mapalambo ang pagtuo, paninguha nga molabaw pa ang imong gibuhay kay sa imong obligasyon. Sa maong paagi madugangan ang imong kadasig sa pag-amuma sa imong gituohan.

Ang Uyok sa Pagtulun-an

Nakita na nato sa mga pipila ka mga tudling sa pulong sa Dios kon unsa ang pagtuo, unsay tuburan niini ug kinsay angayan magbaton aron mahingpit ang kaluwasan.

Atong duawon pag-usab ang pinakadaling bungaton nga versiculo sa biblia—ang Juan 3:16. “Kay gihigugma pag-ayo sa Dios ang kalibotan ug tungod niini gihatag Niya ang Iyang bugtong anak aron ang tanan nga MOTUO Kaniya dili mamatay, kondili makabaton hinuon sa kinabuhing dayon.”

Ang gihanyag sa Dios nga kinabuhing dayon ubanan diay sa atong pagtuo aron hingpit ang proseso sa kaluwasan.

Si Pablo adunay dugang nga mga pahayag: “Sumala sa Kasulatan, 'Ang tanan nga mosangpit sa ngalan sa Ginoo maluwas.'” Apan unsaon man nila pagsangpit kaniya kon wala sila motuo? Ug unsaon man nila pagtuo kon wala nila hidunggi ang mensahe? Ug unsaon man nila pagkadungog kon wala kini iwali? Ug unsaon man pagwali sa mensahe kon walay gipadalang magwawali? Sumala sa Kasulatan, “Pagkatahom sa mga tiil niadtong nagwali sa Maayong Balita!” Apan wala modawat ang tanan sa Maayong Balita! Si Isaias miingon: “Ginoo, kinsay mituo sa among giwali?” Busa ang PAGTUO naggikan sa pagpamati sa mensahe, ug ang mensahe naggikan sa pagwali sa pulong sa Ginoo. (Roma 10:13-17)

Atong nakita nga ang pagtuo sa usa ka butang kinahanglang tun-an ug mapamatud-an. Ang Iglesia sa Dios Internasyonal usa sa mga pundok nga nagsangyaw sa mensahe nga naggikan sa mga pulong sa Dios. Gipaninguha niini nga ang mga gidalang mensahe lunsayng gikutlo gikan sa biblia, ug tin-aw nga ipadangat sa mga magbabasa- usa ka misyon nga nag-agad sa mga bendisyon ug katakos nga itugyan niini gikan sa Kahitas-an.

Mga Basahon nga mainyong libre:

- Ang Imong Kapalaran
- Unsay Sunod sa Kamatayon
- Unsang Adlaw sa Nabanhaw sa Jesus
- Kinahanglan ba magpa Bautismo
- Ang Ginharian sa Dios

I-text lang ang ngalan ug kumpletong pinuy-anan sa 0917-8116365 aron mapadalhan sa labing sayong panahon.